

DOMENIE XXVII «VIE PAL AN»

Antifone di jentrade cf. Est 4,17

Dutis lis robis a son sot de tô paronance, Signôr, e nissun nol pues fâti cuintri.
Tu tu âs fat il cîl e la tiere e ducj i spetacui che a son sot dal cîl.
Tu tu sês il Paron di dutis lis robis.

Colete

Diu onipotent e eterni,
che, cu la bondance dal to boncûr,
tu vâs plui in là dai merits e des preieris di chei che ti suplichin,
spant sore di nô la tô misericordie:
in mût di perdonâ ce che la cussience e à pôre
e zontâ ce che la preiere no olse.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Ab 1,2-3; 2,2-4

Il just al vivarà pe sô fedeltât.

Dal libri dal profete Abacuc
Fin cuant, Signôr, varaio di clamâ jutori
cence che tu mi scoltis?
Varaio di berlâti: «Violence!»
cence che tu mi salvis?
Parcè mo obleâmi a viodi la tristerie
e a scugnî cjalâ la opression?
Denant dai miei vôi a son robariis e violence;
e je barufe e la sconcuardie e vinç.
Il Signôr mi à rispuindût e mi à dit:
«Scrîf la vision,
incidile sun breutis,
par che a corin a leile.
Parcè che la vision e rivuarde une date,
e spiete une fin, no fale;
se si intarde a vignî, spietile,
parcè che e vignarà impreteribil, no si intardarà».
Ve: chel che nol à il cûr just al socomp;
il just invezit al vivarà pe sô fedeltât.
Peraule di Diu.

SALM RESPONSORIÂL dal Salm 94

R. Fâs che o scoltin la tô vôs, Signôr.

Vignît, batin lis mans al Signôr,
fasin fieste a la crete che nus pare;
presentinsi denant di lui ringraciantlu,
fasin fieste cun cjantis di ligrie. **R.**

Vignît, butinsi a schene plete
denant dal Signôr che nus à creâts,
parcè che al è lui il nestri Diu,
e nô, il popul che lui al passone,
il trop de sô malghe. **R.**

Joi, se vuê la sô vôs o scoltassis:
«No stait a inrochîsi tal vuestri cûr come a Meribe,
come tal desert te di di Masse,
là che mi àn tirât a ciment i vuestris paris,
a àn volût provâmi,
ancje se a vevin viodudis lis mê s voris». **R.**

SECONDE LETURE 2 Tm 1,6-8.13-14

No sta vergognâti di testimonê nistri Signôr.

De seconde letare di san Pauli apuestul a Timoteo
Benedet, ti racomandi di tornâ a fâ sflamiâ il don di Diu che al è in te midiant de imposizion des
mês mans. Di fat Diu no nus à dât un spirt di timidece ma di fuarce, di amôr e di sintiment. No sta
vergognâti alore di testimonê nistri Signôr e ancje me che o soi in preson par lui, ma patîs invezit
cun me pal vanzeli confidant te fuarce di Diu.
Cjape come spieli lis sanis dutrinis che tu âs sintudis di me, te fede e tal amôr che al è in Crist Jesù.
Ten cont dal bon depuesit midiant dal Spirtu Sant che al vîf in nô.
Peraule di Diu.

CJANT AL VANZELI Fil 2,15-16

R. Aleluia, aleluia.

Lusît come stelis tal mont,
tignint alte la perauale di vite.

R. Aleluia.

VANZELI Lc 17,5-10

Se o vessis fede!

Dal vanzeli seont Luche

In chê volte, i apuestui i diserin al Signôr: «Fâs cressi la nestre fede!». Il Signôr ur rispuindè: «Se o
vessis fede come un grignel di senape, o podarêssis dîi a di chest arbul: Gjave lis lidris di chest teren
culi e va a plantâti tal mâr, e lui us scoltarès.

Cui di vualtris, se al à un famei che al è a arâ o a passonâ il trop, i disaraial cuant che al tornarà
dongje dal cjamp: Ven chi svelte e sentiti in taule? No i disaraial invezit: Preparimi la cene; tiriti sù
la vieste e servîs in taule, par che jo o puedi mangjâ e bevi, e dopo tu podarês mangjâ e bevi ancje
tu? Si sintaraial forsit obleât cul famei dome parcè che al à fat ce che i jere stât comandât? Cussi
fasêt ancje vualtris. Cuant che o varês fat propit dut ce che us è stât ordenât, disêt: O sin fameis che
no valin nuie. O vin fat dome ce che o vevin di fâ».

Peraule dal Signôr.

Su lis ufiertis

Acete, Signôr, ti prein,
il sacrifici che tu stes tu nus âs comandât
e, cui misteris sants che o celebrin par dovê di suditanche,
indegniti di santificânus ad implen cu la tô redenzie.
Par Crist nistri Signôr.

Antifone a la comunion Lam 3,25

Il Signôr al è bon cun chel che al spere in lui,
cu l'anime che lu cîr.

Daspò de comunion

Diu onipotent, danus di cjapâ sostentament
e spirt midiant dai tiei sacraments,
in mût di trasformâsi in chel che o ricevin.

Par Crist nestri Signôr.